

In'artista da Glion ha gudagnà il Cristal da Pro Infirmis 2014

■ **Cun la surdada dal Cristal da Pro Infirmis da quest onn vul Pro Infirmis tegnair quint dal patratg d'integrar en nossa societad umans cun impediments. Artistas ed artists cun u senza impediments han gì la chaschun d'inoltrar objects d'art en il rom dad in'exposiziun comunabla davart il tema «Nus n'ans laschain betg impedir». Sandra Palaia-Moor da Glion ha persvadì la giuria cun ses maletg expressiv. 38 objects d'art da gruppas e da personas singulas èn vegnids inoltrads per la concorrenza d'art ed exponids durant in mais en il center da furmazion per**

la sanadad ed ils fatgs socials (cfss) a Cuira. Las ovras zunt differentas han illustrà fitg bain las diversas modas da s'exprimer da las artistas e dals artists.

Per la premiaziun da l'indeschavel Cristal da Pro Infirmis han ins pudì engaschar ina giuria cun personalitads da l'economia, da la politica, d'organisations spezialisadas e da la scena d'art. La giuria ha gì l'incumbensa difficila da tscherner differentes objects e da valitar la creatividad, l'expressividad e la relaziun cun il tema «Nus n'ans laschain betg impedir». En il center da la valitaziun èn stads ils objects d'art e betg las artistas ed

ils artists. I n'ha giugà nagina rolla sch bain las artistas ed ils artists han impediment u betg. Pir a chaschun da la surdada dals premis èn sa preschentads las artistas ed ils artists ensemen cun lur objects.

La pli gronda impressiun ha fatg a la giuria la tempera da *Sandra Palaia-Moor* cun il titel «WEG vom PC, HIN zur PERSON.» Ella ha survegnì il Cristal grond ed uschia il premi principal da 1200 francs. Il segund plaz ed 800 francs èn ids a *Manuela Dorsa* da Samedan e sia installaziun «La poesia della differenza». Il terz premi, ch'è dotà cun 500 francs,

ha la giuria surdà a la sculptura realisada comunablamain dals assistents e clients dal center dal di Arche Nova a Landquart.

En il senn da la renconuschientscha per la lavur creativa fitg variada represchentan ils objects victurs tut las ovras inoltradas.

Las ovras premiadas vegnan exponidas a partir dal 1. da december 2014 fin l'entschatta da schaner en il center per seniors Rigahaus a Cuira e suenter en la Casa Depuoz a Trun. Singuls objects d'art èn venals.

Pro Infirmis Grischun